



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál sira
18 Marsu 2020

JSMP apresia Tribunál Rekursu ne'ebé fornese fasilidade bá iha Tribunál Distritál sira

Tribunál Distritál sira hetan apoiu fasilidade husi Tribunál Rekursu (TR) hodi fasilita di'ak liután funsionamentu tribunál distritál sira tuir kompeténsia ne'ebé hatuur ona iha Konstituisaun atu hala'o justisa hodi povu nia naran.

“JSMP apresia Tribunál Rekursu bá apoiu hirak ne'e no liuhusi apoiu hirak ne'e bele rezolve dezafiu sira ne'ebé durante ne'e tribunál distritál sira infrenta,” dehan Sr. Casimiro dos Santos, Diretór Interinu JSMP.

Tribunál Rekursu entrega fasilidade sira ne'e hahuu husi fulan Setembru 2019 to'ogora no bazeia bá nesesidade kada tribunál sira, hanesan tuir mai :

Tribunál Distritál Baukau, iha Janeiru 2020, simu fasilidade *kobe house* rua no *container* ida ne'ebé agora daudaun *kobe house* rua ne'e utiliza ba seksaun sivíl no krime, enkuantu *container* uza bá rai objektu krime sira. Entretantu salaun sira ne'ebé antes ne'e uza bá seksaun krime no sivíl, agora daudaun uza fali bá sala juis, sala julgamentu bá kazu singulár no sala bá prokuradór no defensor sira. Antes ne'e, iha Novembru 2019, Tribunál Rekursu entrega ona komputadór hamutuk 15 no iha Setembru 2019, Tribunál Rekursu entrega mós kareta hamutuk hitu ne'ebé kareta neen bá juis sira no kareta ida uza bá operasionál.

Tribunál Distritál Suai, iha fulan Janeiru 2020, simu fasilidade hanesan *kobe house* ida no *container* ida inklui mákina imprime, *Air Conditioner* (AC) no komputadór bá ofisiál no tradutor. Hanesan ho Tribunál Distritál Baukau, TDS mós simu kareta bá juis sira no kareta operasionál.

Tribunál Distritál Oekusi, desde iha fin de Dezembru 2019 to'ogora, Tribunál Rekursu entrega komputadór hamutuk 10, AC hamutuk 12, mákina imprime foun boot ida, almáriu hodi rai objektu krime nian no kareta operasionál rua ne'ebé kareta ida fó bá Sekretáriu Judisiál TDO no ida seluk uza bá kareta operasionál.

Enkuantu *Tribunál Distritál Dili* mós simu facilidade hanesan laptop bá juis balun, kareta bá juis sira no kareta operasional ida. Aleinde ne'e, hariis-fatin ne'ebé iha tinan sira bá kotuk ho kondisaun la di'ak maibé agora daudaun kondisaun di'ak ona.

Antes ne'e iha Juñu 2019, JSMP hato'o karta¹ ba Prezidente Tribunál Rekursu hodi solusiona dezafiu sira iha tribunál distritál sira ne'ebé fô impaktu bá funsionamentu serbisu tribunál sira-nian ho efetivu.

Nune'e dala-ida tán JSMP kongratula TR bá esforsu no seriedade responde dezafiu sira ne'e hodi asegura justisa báema hotu tuir lei haruka. JSMP konsidera katak bainhira tribunál sira serbisu ho konfortável, serbisu ho di'ak no efetivu, bele hametin liután konfiansa públiku bá tribunál sira no atinje objetivu Estadu iha asegura direitu sidadaun sira-nian iha asesu bá justisa formál.

JSMP hein katak iha tempu badak Tribunál Rekursu mós sei fasilita gravadór bá tribunál distritál sira hotu, tanba gravadór sai hanesan parte ne'ebé esencial tebetebes liuliu hodi asegura interveniente sira nia deklarasaun iha produsaun bá prova no mós fasilita tribunál bainhira foti desizaun.

Atu hetan informasaun kle'an liu tan favor kontaktu:

Casimiro dos Santos

Diretór Interinu JSMP

E-mail: santos.cas76@gmail.com | casimiro@jsmp.tl

Website: <http://jsmp.tl/>

Telefone: 3323883 | 77257466

¹ <http://jsmp.tl/wp-content/uploads/Relatoriu-Informasaun-ba-Prezidente-Tribunal-Rekursu.pdf>